

## Fastnacht 1923



# Fideli Ehemänner

(Alt Justiz-Clique)

Mel.: „Trautes Schätzchen zage nicht.“

1. So-ne feine Schnitzelbangg  
Isch fidel, was wänner?  
Dorum finde-n-au d'r Rangg  
„Fideli Ehemänner“  
    Mir verzelle-n allerhand  
    Wo me gärn duet b'halte,  
Refr.: Nur deheim im Eheschtand  
    Do häisst's: „D'Schnure halte!“
2. D'Basler Bolizei, die fiehrt  
Ain nach Leerach dure;  
Derte sinn die unscheniert  
In e Baiz go schmure —  
    Und dä Strolch isch dure brennt!  
    Blamiert sin d'Bolizische —  
Refr.: Wär Eieri schwachi Sitte kennt,  
    Ka Eich iberlichte.
3. S'Duet ain e Regierigsrot  
„Baizer“ tituliere,  
Was däm Heer uf d'Närve goht,  
Er duet proteschiere!  
    Mänge wär no Baizer gärn —  
    Als mit Kommunische  
Refr.: Mit d'r Sichle und em Schtärn  
    So kommun go z'mische!
4. D'Schuelerbuebe, die hänn's scheen  
In Glaihinige-n-unde,  
Will si als go schpiele geh'n  
Während de Schuelschtunde!  
    Dä Betrieb isch wirgglig guet:  
    's isch im Lehrer ibel,  
Refr.: Und derwils ~~er~~ är pfuse duet,  
    Haue's die in Kibel!
5. D'Vermeegeesabgob isch falliert,  
's Volk het do entschiede,  
G'sorgt wird au — het me blagiert —  
Fir die Invalide.  
    Aber 's wird nit duregfiehrt,  
    's Volk duet's schwär empfinde:  
Refr.: Bisch du alt und usrangschiert,  
    Griegsch e Tritt vo hinde!
6. Basel wird e Gross-Schtadt jetz!  
Doch uf unserem Pflaschter  
Git's dank unserem Wybergsetz  
Wirgglig kaini Laschter!  
    Wotsch mit Kokaïn Du ko —  
    Liebe Frind, denn drugg Di:  
Refr.: Mir schtehn sittlig ainzig do,  
    Au in Sache „Bugg Di“!
7. Dobe-n-uff em Bruederholz  
Git's Freiliecht-Kumeedi!  
D'Theaterlaitig schpielt voll Schtolz  
D'Salome-Trageedi!  
    Und das Schtig, das wirggt perséh  
    Denn me g'seht im Schatte  
Refr.: Mäng modärni Salomé  
    Hinde-n-in der Matte!
8. Politik im Schtägehus  
Isch e Schand fir Fraue,  
S'git au g'wehnlig Händel drus,  
Sie dien enand verhaue!  
    Und d'r Grund vo däre Schlacht  
    Isch d'r ditschi Kaiser!  
Refr.: Währ'nd är z'Holland Kletzli macht,  
    Schreie die sich haiser!
9. Wie kunsch Du do nur derzue,  
So'e G'setz z'erfinde!  
Glaub'sch Du wirgglig, d'Schwyzerkueh  
Liess sich s'Muul verbinde?  
    Lueg, dä Muulkorb, jo perséh  
    Blibt Dir jetz am Krage!  
Refr.: Beschteilt isch b'schtellt, was wotsch  
    Muesch en sälber trage! [no meh?]